

四庫全書

集部

欽定四庫全書

梅山續藁卷六

宋 姜特立 撰

歸山間舟中寄黃正言

黑風吹雨亂雲奔一舸浮家過別邨
便有新涼生竹樹更添清興集繁樽
打篷點點催詩思著面蕭蕭冷醉魂
來日小溪山水活一波盡是使君恩

黃正言為邑宰累罷郡送行

人生皆有別此別良不同不作兒女戀
慘然見顏容郭

奕追叔子后山逐蘇公二賢問世士二客有古風不畏
簡書誚越境遠相從上下數百載凜然兩相望我亦何
為者偶在寮案中荷公以禮遇詎敢忘敬恭公才自超
卓落落澗底松我老無所用颯然一衰蓬相送三十里
已復媿前蹤願言養宏博吾道終當通

贈添髭宋道人

道人添髭鬚返老作年少雖得陸公憐却被呂公笑道
人爾休癡百年終漏逗

司馬倅解組送行

雙溪梅水飛洪濶風掣五兩爭檣竿有美人兮彼何官
東陽別駕司馬孫兩攝郡紱私不干二年解組知歲寒
五規三戒投天關經筵賜讀帝意懽此行定合陪清班
發揚祖德仍追攀勸君一杯勿留殘轉首咫尺過前灘
王俊卿所居甚隘而看山亭依浮圖之址卓然
孤起誠偉觀也

吾憐廛市人偪仄烟火隘六月圍炎蒸引吭思大噫誰

知蜂螳聚却躡鯨黿背近山羅前欄遠岫落天外浮圖
卓孤標如大舶航海蓬萊與方丈便覺咫尺在酒酣揮
八極醉眼聊一快更須約安期萬里弄澎湃

赤松三詠

仙山名字幾千秋勇退曾聞漢故侯自笑功名無尺寸
歸來也作赤松游

右赤松山

四山古木老烟雲流水桃花幾換春舉世但誇羊化石

那知不有武陵人

右小桃源

自從兄弟得神仙一去空山竟杳然唯有華陰舒道士

好詩長與此山傳

右二仙廟

賦婺州之錄參廳明遠樓為李中甫董奇卿作
也

脚蹴南樓咫尺間手摩八詠境全慳東西合抱兩溪水

遠近平分千里山，但見孤鴻渺天際。
更無野馬臨人寰，一時從事先名實。
豈有能誣雀鼠姦。

偶題

霜降水自落，春濃花欲迷。
道心因老進，狂態逐時低。

永日

永日靜無聊，空庭散鬱陶。
鶻禽猜落果，乳雀趣飛毛。

賞花醉吟

七十衰翁雙鬢皤，每遇花時拚醉倒。
今年只是去年花。

故吾何似今吾老空中日月籠中鳥萬古賢愚塵一窖
尋思世事總浮雲斷送一生唯有酒

和黃正言勸農

雙溪溪上綠初勻曉日曛曛霽景新五馬先聲才出郭
九農和氣已生春教條頒布人心悅父老醺酣德意親
從此脩民俱力穡會看優最上嚴宸

失駿子

舐犢情何限亡羊意易迷聊為暮景玩遽與小年齊漲

乳空宵哺深閨失曉啼已知真幻泡感至一悲悽

乙卯春自郡歸賞牡丹適有故竟回唯魏紫略

放二頭

歸早開遲兩寂寥經年不見董妖嬈芳心未展緣何事
半是閒愁半是嬌

夢想看花歸意濃歸來底事別花忙魏家姊妹知人意
先試春風半面粧

和司馬倅喜雪

寒意沉沉雲氣深老來病骨冷難禁巢禽一出不知下
籠鶴乍飛無處尋便欲騎驢洛陽市不妨放棹越山陰
天公已作豐年瑞更仗風威掃滯淫

歲在紹熙甲寅浙東西大旱旁連江淮至秋暴
雨水發天目漂民廬浸禾稼而蘓常大歉小人
趨利爭運衢婺穀粟順流而下日夜不止又去
冬歲暮多雨連綿至春半未有晴意人情憂悶
聊書數語以備采謠者至辭之工拙固所不計

也乙卯仲春作

去年數州旱秋雨漂民廬今年復春霖赤子憂為魚不見日月旋但見霰雪俱處者絕營為出者困泥塗近山不可樵平地不得鉏有壤莫糞田有火莫燒畬花木淡慘慘麥苗冷踈踈張王堦下苔寒酸井邊蔬上天胡不仁蒼生一何辜傳聞常潤間流殍滿路衢鄞江禍尤酷越山復何如米鄉已無積山郡豈有餘小人急眼前負販日夜趨只知利一已豈暇卹里閭屈指至秋成未可

保無虞堯湯備先具庶冀收桑榆

喜楊方叔見訪

初以梅花為約
既而仲春方至

憶別西風首重回今朝相見笑顏開
梅花臘底思君語桃葉春前望客來
足健尚堪凌翫翫詩工未許繼堆脰
山園近日新成趣正要相携把酒杯

讀漢史

萬石躬行不讀書公孫張禹號名儒
詩書何罪工發冢自是諸生愛領珠

乙卯元宵多雨

臘前雨勢已翻盆
臘後淋漓到上元
燈火不張蟾彩暗
笙簫有禁雷聲喧

時過密
禁樂

麥田聞道水盈尺
里巷想應

泥沒門閤坐孤吟
無好況三杯冷落對黃昏

又

連年旱氣民愁食
及至春來又雨霖
濕麥卧泥難辨草
寒蔬入市貴如金
燈輝不到愁人眼
節物空驚老者心
且喜今朝日光出
更須風力掃重陰

種桃

種桃三百樹隨處有
開花來年三二月便是武陵家

聞衍孫恪得舉

慶事聯翩走四鄰
吾家門戶一番新
明年雙上青雲去
為汝山園作主人

陳德承致政一子中舍選
次子中涓臺與余二
息同勗賀之

皇朝網英材三歲設科目
四海一飛龍
兩家雙中鵠得

非詩禮效且喜箕裘續二老亦牽連明年書小錄

陳德承致政病後得詩且以見賀

上恩鼎至愧叨逾退省何嘗有碩膚甘作一麾山吏部
不為三敗管夷吾相思夢想江湖隔熟誦篇章錦繡鋪
無妄疾來終易愈豈容鑿砭值庸夫

一麾前輩
謂麾去也

烘被詩

烘被龜藏六煇煇梨棗春不唯勻踵息且以煖腰身
蟲間尋句聽雞怕及晨是中有真味不羨北窓人

夏月山中聞鶯

深山五六月猶自有鶯簧只滿幽人聽何如入建章

鶯答

自是山禽侶徒因語得新不堪供貴玩却作李山人

菜羹二首

擬續冰壺傳嘗賡玉糝詩蒸豚貴公子却莫遣渠知
一自入金門屢蒙分玉食今朝苜蓿盤猶疑照初日

因見市人以瓦缶蒔花屋上有感

城中寸土如寸金屋上時花亦良苦因思離宮與別館
南至九峻北鄆杜東西延袤八百里橋梁裹空七百柱
傷哉好大荒主心豈識世間逢筆趣一邱一壑吾輩事
隨分園池何用許我今度地山一隅栽柳栽花已無數
大雖不足小有餘便可終身為老圃

秋暑

吾性仍忍寒不受秋暑悶既抱相如渴復喘平叔汗疥
疾亦相乘爬搔擾軀幹平生懶揮簞况復蚊蚋亂忽聞

隱雷聲引頸若鵝鸛
雨意竟蕭條依然坐深爨
安得天
公仁霜令從此換

詠舞者

李廌

曾見簪花上舞裯
回旋殊不動纖塵
昭陽殿裏無飛鷺
今代誰為第一人

中秋追和

樂聲催遍上華裯
回雪光中不見塵
今日山間易惆悵
當筵踏月更何人

葉仲脩令其子携所作求詩

雅道去已久挽回良獨難
須求正知見莫學小波瀾

父子專詩律風騷逼將壇

謂高鄰有詩翁也

如今寄佳句那復阿

蒙看

秋霽

清秋初過雨濕葉閃晴暉
數冊文書靜一庭人事稀

送枕屏竹爐與劉公達致政道室

不畫椒房百子圖銷金帳下擁流蘓
聊將鷗鷺滄州趣

伴送江西古竹爐

出門

出門誰與游顧影側我情賴有木居士作伴山中行

吾家

吾家何處住一嶂獨成圍莫遣通樵斧應嫌減翠微

畏途

畏途謝排斥造物遂初志彼雖快其私我獨佩嘉惠愛
憎有回牙恩怨或倒置得馬豈君福鑿渠真我利向使

老班行茲事恐遂廢三逕幸足樂一瓢聊自寄興來或
歌呼客至任醺醉以此終百年何用一品貴猶勝白首
歸流光忽西墜

趨郡回

老去猶趨府往來添客愁丹楓漁舍晚花麥野田秋

新居覓竹栽

闢疇事廬井物色費經營正擬一屨足便懷三徑情吾
居恐全俗君圃有餘清急欲就佳趣哦詩乞翠莖

覓橙曾有句乞竹可無詩
好輟東南轡同為風月期
根豐宜地力萌達趣春時
他日如相過清陰滿酒卮

子陵祠堂後兩崖對起可高百丈或者指為釣臺

壁立雙臺百丈餘如何竿綫擲空虛
時人不會先生意只釣清名不釣魚

閒賦

樓臺百萬裝成花木四時羅列從渠
眼底江山欠我詩

中風月

側金盞

淺淺嬌黃向日開
枝頭斜掛幾金杯
細詳名字并花意
不醉花間不得回

小橋

小橋橫野澗
物色自孤清
終日相晤語
松聲與水聲


庭草

一簇牆陰綠正繁
不依朱戶傍雕欄
竹光苔色深相映

只許閒人靜處看

又

幽幽庭下草
悟悅有禪味
君看紅紫場
紛紜亂人意



梅山續藁卷六

欽定四庫全書

集部

梅山續藁卷

七至九

詳校官庶吉士臣翁樹培

主事

臣呂雲棟覆勘

總校官進士臣繆琪

校對官中書臣朱炘

謄錄監生臣李學瞻

欽定四庫全書

梅山續藁卷七

宋 姜特立 撰

繭庵 記附

乙卯之秋姜子得吉卜于寓居武川王澤山之麓其岡曰壬闢然而止其向己丙屹然而起其流回環既北而南前遇峭峰折而西去四山如圍氣聚勢合造化鍾粹別為一區於是即其左方為屋二十楹榜曰繭庵夫保蟲

三百而人為之長蠶特小而靈者也傳曰紅
蠶以繭為衣又曰飢蠶作室衣與室所以析
繭之義孰謂蠶能繭而人不繭乎雖然情者
不預繭窶者不暇繭人而能繭亦足尚已繭
有三義善藏其身似智利被於物似仁生生
不窮似道一舉而三美具以是名吾庵不亦
可乎

初營

萬物有終始吾生如幻泡辛勤蠶作繭來往燕成巢不作蘂裡掩寧湏馬革包劉伶行帶鍾未免達人嘲

落成

繭庵吾自名所喜以吾息一絲出巧心口眼費經畫無畏亦無累豐儉隨人力時時携妻子杯酒縱酣適家人獻歌舞賓友雜嘲劇此意少人解此庇無終極曹瞞西陵前作伎竟何益劉伶墳上土誰與酒澆滴高堂豈不好要自非吾宅王侯與氓隸萬古一枯腊自營自落之

詎敢當達識有酒更頻來寬作十年客

和韻題繭菴

許及之

判院程丈述示所和梅山繭庵詩開發為多
予曩畢犯禾之役思同穴之義而預作壽藏
亦名其旁曰繭窩欣然敬和比兩得梅山書
而稽報判院丈或可轉達庶幾少贖逋慢之
過焉耳

榮枯翻覆手生死出入息那將有限身苦作無俚畫譬

彼三眠蠶已足三食力作繭聊自藏隨化各有適石櫛
翁固癡鍾埋兒作劇憶昨辦同穴物理念終極斷地號
繭窩開徑延友益今聞梅山作真得曹溪滴袖手將詩
壇忘形規壽宅達觀接前脩美意非毒腊智愚雖相較
今古歸一識何當訪此老同為逆旅客

寄題繭庵

陸游

君不見贅翁退隱真皇時繭室遺名星日垂雖無豪士
千車送不媿高人一鍾隨又不見貞觀故人有王顯抵

老摧頽不作繭一時戲語今尚傳人生窮達誰能免繭
庵知君出遊戲壽過期願乃常事青松手種三千本會
看半空翻鼓吹人老則衰君不然快瀉玉船鯨吸川釣
璜遠祖應相似八十方為筮仕年

附記

兩朝國史王樵字肩望號贅世翁作繭室銘
曰天生王樵薄命寡智才不濟時道號贅世
生而為室以備不虞死則藏形不虞乃備樵
真廟仁廟時人也太平廣記王顯唐太宗故
人太宗微時嘗戲之曰君抵老不作繭及帝
登極而顯謂因奏曰臣今日得作繭即帝笑
云云放翁此詩用事精切足以發明吾意誠

可仰也以書來曰薊庵記及初營落成二詩
大手老筆超然絕俗明公富貴壽考皆未易
測於此可卜豈
戲我乎併記之

六言

康樂尋山伐木子猷愛竹叩門我已烟霞痼疾每逢佳
處開樽

禍福

君子多短拙動或福隨之小人最狡獪往往觸禍機巧
者極人力拙者無所為巧拙不必問天道自平夷

秋旱驟雨

滂沱一雨洗清秋千里郊原旱氣收
急遣奚奴洗觥醖醒心亭上看溪流

買烏薪戲題

雨雪冬春無了時烏薪斷續惱衰羸
偶然買得婆歡喜且免山翁曉皺眉

晨起出門

水繞芳堤雲繞山數椽茆屋住中間
神仙更自足官府

世上誰如此老閒

山堂輦先生輓詩三首

源流簡公出名字魯山宗

韓庭芝字德秀

避地江之左驚人易

以東機雲千載裏歆向一門中敬止山堂老才名是至公

風采儒林虎波瀾學海鯨公家五進士此地半諸生勾漏丹俄就中牟政亦成如何賈太傅位不至公卿

綰章南北異轉首死生分手澤空遺墨書籤冷舊芸行

湏潘岳誄碑已蔡邕文身後無儋石玄成似子雲

和元亨出示山扉詩

手自葺柴荆山扉亦自扃莫辭蓬簞陋要護艸堂靈忙
為幽人啟閒無俗士經不妨老赤脚磨戶代奴星

寄方叔

落葉滿滄灣墜露濕疎柳幽人曉無事杖策經林阜忽
焉若有省懷此山中友便欲借風翰翩翩插雙肘

古風送行陳省元

梅山老人頭雪白摸索曹劉還認得平生鹿鹿視餘子
誰是詩中真巨擘踵門忽得天下士慕我虛聲遠相覓
袖中磊砢出奇語和璧隨珠暗相射對之坐久神氣定
言下分明箭鋒直傍觀如堵相駭愕頗復見我有此客
雄篇累日費酬答但怪筆端飛霹靂君才自是千里駒
鞭影不搖何待策古人妙處應自知悟解多端難指畫
請君更去勘諸方莫道梅山得消息

和潘倅新溪七首

山色湖光相接連千章古木老雲烟晚來曲港回舟處
如在孤山柳嶼邊

平湖瀲灩帶垂楊綠暗長堤五月涼綵女移舟蓮浦去
棹歌聲裏水風香

濃淡燕脂千樹開崇光香霧襲人來如今不共梅花笑
步繞行吟日幾回

釣月亭邊三兩家月明無處認蘆花忽聞鶉鴉相驚起
知有溪禽在淺沙

溪頭風月四時新
機盡還欣
鳥鳥親沮溺相逢如借問
報言老子自知津

如君方此富春秋
未可追尋三逕遊
且放子真歸谷口
不應馬援困壺頭

我來久矣了窮通
出處誰能與衆同
此去便須專一壑
人生何必作三公

蝦蟆

周公灑灰垂典教
為爾朋徒多取鬧
如今大索不相容

省口何如且泥淖

有感

巍峩厦屋起千間更作朝廷第一官
幾箇得歸仍得老可憐一世不曾間

歸老

歸老得閒渾可事最憐白傅更能詩
舞餘歌罷賓朋去八節灘頭醉臥時

和虞守釣臺四首

龍衮羊裘孰重輕當時俱是一書生
相忘道術仍忘勢超出人間萬古情

七里灘頭歲月增漢家川谷幾丘陵
祠堂只許玄英配此後寥寥見未曾

天下清名屬至公當時四七謾英雄
祠庭千古增輪奐不見雲臺續畫工

先生蟬蛻出塵埃萬古聲名一草萊
盡道高風激貪懦何人到此挽舟回

胡彥功輓章中間家事少貶遂謝賓客絕饋餉
者三十年已而復振

祖風文采秀儒林父德幽遐玉有音廷尉何妨謝諸客
鵠夷還復致千金門前輿馬多英貴架上圖書浩古今
欲識遺芳傳不朽伯喈文字在球琳

贈方叔

世間曠士如君少天下間人似我稀一曠一閒無一事
只應鷗鳥共忘機

誕日戲作亦可以瑞鷓鴣歌之

梅山誕日簇觥籌更挾娉婷共勝游此去只求閒富貴
人生須是老風流

拄杖

脚力未須扶時時踏莎逕愛君如友生伴我山行興

門外

門外青山列髻螺園中花木錦成窠慚無功業報明主
空占閒居樂事多

道中小詩呈虞察院

歸路指城隅，城樓出畫圖。
水光搖野艇，雲影掠平蕪。
祇合山林住，胡為朝市趨。
丘丹不浪出，五字訪姑蘇。

和

虞儔

城郭迎車騎，溪山展畫圖。
歸鴉翻落照，宿雁集寒蕪。
酒裏傾肝膽，吟邊識步趨。
佳人來底暮，心似碧雲蘇。

糟蟹呈虞察院

星分井鬼占高躔，瑣細還書食饌編。
不作屈原醒到死，

却同李白醉登仙
濡涎唧唧生泉眼
悶息陶陶樂甕天
口腹固知能累德
為渠風味一軒然

和

虞儔

偪塞圓臍不計錢
將糖彌躁賴蒲編
舉盃聊試持螯手
下筯空餘蛻骨仙
爭向槃中誇得雋
誰知酒裏獨全天
無腸不與人間事
骨醉憐渠為惻然

再賦

禍成篝火最堪憐
蒹索寒蘆更與編
細剔膏蘇付饒子

却吟醉骨屬詩仙
沉冥併作南柯夢
混沌誰開太極天
聞道將糖尤躁擾
鮮蒲投甌想騷然

虞丈以傷物遂再賦

省口須知亦省緣
食經爾雅不勞編
山中且縱無腸子

抱朴子云山中稱
無腸公子者蟹也

海上長隨踞殼仙
凡物身中皆有佛

何人性裏獨無天
反騷正得詩人意
讀罷新章為憮然

又

古來儒墨本同源
罪福區區不足編
燕饗正須依孔聖

慈悲何必異金仙
靜思有物叅元化
俯視含生共一天
梁武漢明俱泥佛
得言失旨豈其然

出郭

歲暮偶出郭
斜陽帶遠邨
雪松含臘意
沙水動春痕

春曉

春來貪起早春思
還繚繞一語破
春愁黃鸝韵清曉

有感

六年歸老掩柴扉
今日天涯有所思
山阻雪深無去路

淒涼只詠四愁詩

菜羹

淺下薑鹽細點油小甘微苦嫩香浮是中自有天酥味
說與饒兒只掉頭

極目亭有懷韓常伯

先生種柳已成圍柳外孤亭但夕暉如覺隱侯前日去
不知丁令幾時歸雲帆夜夜沙頭落風葉年年城上飛
弔古登臨仰詞伯苦吟精思入幽微

追送虞察院

夜半小溪飲酒深，增別情客隨舟共遠。
詩與雪俱清，嚴瀨雲木冷。
富春烟水平，故人相憶處。
應過鳳凰城。

和

虞 儔

相知何必舊，我輩正鍾情。
老去難為別，詩來愈覺清。
虛舟和雪載，淺水過灘平。
一路皆佳境，收歸五字城。

梅山續藁卷七

欽定四庫全書

梅山續藁卷八

宋 姜特立 撰

秋江柳

春暖和烟重冬寒帶雪稀何如秋浦畔含思獨依依

方叔每歲一相訪送行

耐久交情歲月深今朝何事返家林北鴻西燕一年別
流水高山千古心何日從公歌舊曲

偶同謳昔時舊曲
有感歲月之邁

無人伴我賦清吟若為雲氣從東野應繞劉岩紫翠岑

寄方叔

懶過醒心亭無人作伴行禽魚皆命侶松竹亦同聲只
作留時意那思別後情連宵懷晤語心惻未能平

去燕

去燕忽若失斷蟬淒復連不唯觀物化且以感流年

曳杖

曳杖度林樾晴光破衰顏好鳥忽相鳴覺我身世間身
世誰自覺此妙吾獨觀正以靜得之樂哉天地寬

寄題楊先輩霧隱

猛虎樹摩痒更為蟲所蝕元熊擲崖木正坐勇與力爾
豹居其間而復有二德既不眩文采亦知身足惜衣錦
貴尚聚桐梓惡戕賊含章大臣體深居君子識室以霧
隱名茲士有典則韜養日以久何患不輝赫而况數鉅
公銘詩播金石只恐難久藏却為人所即

對鏡

少年鑒止水自喜顏色好如今對明鏡但覺增老醜老

醜將奈何行當就枯朽古來聖與達閱世誰長久仙藥不可求紅顏復何有嵇阮真可人沉冥一杯酒

題許尚書石刻二首

烏絲玉軸陀尼表闢草褰花錦不如不是向來元祐脚
唐人文字晉人書

先生自是吾所敬况復曾蒙點化餘筆妙共推三昧手
尚書安得不中書

閒吟

老去無心思世事靜中有業愛閒吟
有時看水看山處
舉世何人會此心

紅蕉二首

一葉綠鳳尾含烟徑尺紅
英曉更鮮曾見畫歸丹禁裏
太湖石後粉牆前

品格清虛壓衆芳
何年分種自炎方
直疑剪破紅羅軸
插向綠綃深處藏

感舊

忽見鶯鶯挾兩雛
因人感舊易欷歔
佳人例屬沙吒利
春去春來能轉無

送方叔二首

管絃韻勝堪娛客
山水音清好賦詩
底事翩然欲歸去
尊前風月又相思

梅山近日風光好
桃葉桃根總可人
自喜暮年多樂事
非君誰與共花茵

旅懷

寄迹雙溪上秋聲動遠林斷雲流影薄過鴈去痕深舊
館生離思新愁闕寄音到頭俱夢事俛然一長吟

送虞察院

岳牧用詞人古今誠罕有君侯東南雋錦心仍繡口生
從謝朓城日對敬亭阜梅翁丈人行味古若玄酒君能
兼衆作活法參已久今茲守雙溪詩思如河剖前追東
陽侯近繼南湖叟璀璨珊瑚鉤盤屈蛟螭鈕往來互酬
贈覺我殊穢醜砂礫投公筐珠璣落吾手蘓李隔遙天

王劉同魏圓風騷難並世道義況有取高篇許編綴泰
華儕部婁不辭附冥鴻庶以圖不朽君王愛其才復易
吳門守韋郎五字句寂寞今其耦森戟尚高門凝香猶
故牖想當吟哦時妙思出齋白只恐鳳詔催去作仙班
首載賡清廟頌千古換星斗得句勿相忘時寄山中友
乙卯中秋月色徹曉喜而有賦呈諸親舊

客來暮靄尚周遮客坐乾坤見物華萬里更無雲吐葉
一天唯有桂開花肅霜青女令先布專夜嫦娥意太誇

便欲從茲凌汗漫不知何處上仙槎

乙卯種牡丹

課僕昇豐壤辛勤種牡丹不知從此去更得幾春看

山圃

山圃歸來花半空尊前一別五春風
新松已自高三筵舊塹還須廣十弓

效樂天體

田宅不多終是有園池雖小勝如無
三平二滿人間少

此樂唯應屬老夫

山中

山中有至樂靜者得其意所以入山人同來不同味

詩輓樓少陽所生母夫人

繼室侯家古有聞熒煌還得配樞臣香嚴童子先成佛

生子十歲極聰
了一夕坐逝

瑣骨仙人後化身

夫人晚
入道

共喜伯仁今

有母何妨小德外無親向來已悟空乘法合作西方會

上人

詩悼劉夫人

淑德生從積慶門
父兄隱耀更全真
共推蠟屐亭前女
雅稱玄都觀裏人
鸞鏡菱花千葉冷
蟾宮桂樹一枝新
人生百歲今才半
會有重封賁後身

閒賦

人生浮脆若風烟
障麓操籌亦可憐
但得樽中長有酒
不須身後更留錢

賦謝惠醋

送酒古來多曠士乞醢今世少良鄰庾郎寒腹便鮭菜
助我儒酸不厭頻

晚來

晚來山氣冷松下獨門行野鳥聽人語山靈警杖聲

立春前有雪

春前一寸雪春後一犁金萬里烟瘴息九農和氣深

余方悼亡適山圃牡丹芍藥盛開賦長句

白巾對紅艷哀樂自不同緬彼古之人拔去禮法中親

喪至嘔血悲涕固無從不哭即飲酒陶然醉為鄉吾愛
蒙莊子鼓盆歌慨慷吾笑潘河陽忍泪賦悼亡自古皆
有死生滅固其常生也根一氣死焉歸渺茫鍾情雖我
輩達節聖所臧且日飲無何久久永相忘

閒吟

富貴懸諸天禍福人所召但於平處行福輕禍亦少貪
夫只競前而不顧其後忽焉一失脚千佛不可掇

寄方叔

二老論交日真成百歲期同行雙野鶴得意一山雌病
起憐加飯書來渴寄詩已添新蠟屐此興報公知

思微時寄食山寺

招提憶昔寄孤蹤曉甌猶塵午未舂地僻讀書無外事
家貧教子有全功

出處

草木偃時龍入洞鳥鳥噪處虎行岡大賢出處須驚俗
伊尹如何五就湯

賦潘叔玠皆山樓

環滁皆名山正以醉翁重翁時方在郡朱墨猶遮擁君
今建斯樓再食祠官俸雅契醉翁心而無醉翁冗者山
應更真物物皆淨供便尋廬霍期莫作京洛夢只恐難
久間移文北山諷願堅仁者守用靜以觀動

次石魚

君不見隴州石魚生地下中有鰭鯽皆同化又不見衡
湘石魚生山中魚身鱗鬣俱如畫世間何獨此石為魚

形石蛇石蟬皆如生蝦蟆口吻酷肖似螭蟻蠕動幾能
行悠悠荒怪不可考吾意造物初無情陰陽融結亦偶
爾俗智詐可窺杳冥葉君得此不足惜君自川嶽儲英
靈來春禹浪忽變化頭角天上看崢嶸此時回首視此
石棄置殆與砂礫并

有感

少年如曉行志意多間佚老如夜還家行李自迫怵向
來輕寸陰此去惜餘日已往不可追未來嗟莫失昔人

秉燭將不為杯中物

縱目

縱目郊原亂絮飛
好風嬌葉弄天機
白灘半露溪新瘦
綠樹初圓山正肥

和王粹中

昔年曾踏軟紅塵
回首修門七換春
官職不多還不欠
交情無舊亦無新
有花日日招嘉客
問字時時接近鄰
且願梅山新秫熟
許君長作醉歸人

王君玉輓章其子遷其母同穴

昔與先夫子親如老弟兄
君能敬父執我亦感交情
放意杯中物無心世上名
佳城今夜月應伴酒旗明

伉儷存亡隔孤墳一驛西
忽驚雙劍合無復隻鸞棲
路接先塋近雲藏塔岫低
歸乎了無憾送騎滿山蹊

輦大監輓詩

列國名卿號衆多山堂族望最巍峨
魏宮賓客推公幹

王魏

記室交趾威名畏伏波

師廣

老去一麾供坎壈歸來三逕足

婆娑從今詩酒交朋少悵望新阡淚若何

悼亡

安仁愁思怯春寒捫泪題詩曉未乾
雙燕歸來如訪舊不知吾已是孤鸞

蟬

自下高升木杪間風為呼吸露為餐
雖云強聒人憎惡也勝低頭推糞丸

長句贈弟邦達主簿

有弟辭我去明日隔風烟
茭青嶺頭雲憶別二十年
上有古峯巒下有深澗川
我昔去家時過此涕淚漣
汝今復經行豈不念鵲原
人生皆有別此別有何言
我年七十四去日箭脫弦
汝雖後十年鬢髮已蒼然
世味只如此恩義以為先
會少別良多杯酒且留連
何以壽外君贈之新詩篇

有客

有客訪山間愁襟一笑寬
青燈親軟語薄酒緩清歡

十月

十月氣候變園林霜葉黃餘糧栖下畝宿靄草寒塘

和虞守感秋二首

莫憶鱸魚美吳天浪正浮只應歸夢到千頃荻花秋
家音何用寄郵置有沉浮旦夕天邊去書來一鴈秋

送方叔

九日相携上翠微安仁悼內不勝悲琴中只弄無絃曲
歌裏聊陳鼓缶辭來歲須為湯麪約今朝空過菊花時

君家兄弟如相問為報願間已素絲

亡婦小祥將至

老來遽有閨中戚歲月飛騰奈爾何八十耄齡能有幾
九三大耄可無歌祥琴合御吾非激菴樂如聽玷可磨
春到有花須痛飲莫傷歲暮更蹉跎

題梅山詩卷二首

楊萬里

松風澗水打牕聲玉珮瓊琚觸眼明當畫如何挂秋月
未春特地嚶新鶯祇消一卷梅山集幻出千般景物情

老子平生有詩癖為君焚却老陶泓

承華寮案集鴛鴦不減應徐讌魏園中有釣璜清渭叟
向來授鉞少陵壇錦心繡口塞花草雪碗冰甌瀉肺肝
身到梅山得梅魄老夫更借一枝看

和

洋洋海內服詩聲手決雲章萬象明千仞覽輝丹穴鳳
三春刷羽上林鶯蕢桴土鼓有遺韻牛鬼蛇神無遁情
才大渺瀰如碧海蹄涔那敢闢澄泓

接武東朝集鳳鸞相如亦預賦梁園什旗我合堅詩辟
授鉞君當坐將壇妙似春風薰草木深於元氣入脾肝
宮牆數仞難窺測一點曾容豹管看

梅山續藁卷八

欽定四庫全書

梅山續藁卷九

宋 姜特立 撰

余年六十始入侍禁庭數月又直春宮

新年出小却今日直儲宮天道周必復物情窮則通春

叢無寒榮秋畬得晚豐勿悲夕陽句猶勝吾家翁

時有賀者

至余曰夕陽無限好爭奈近黃昏
客云夕陽如有意偏傍小牕明

讀杜子美集

巴蜀勞重往荆湘無定居宦情常造次行橐屨空虛宮

闕烟塵外江村盜賊餘弟兄蹤跡斷妻子信音疎生理
那堪說窮愁自掃除千篇比金玉萬卷是菑畲軒輊齊
梁後憑陵漢魏初嚴公俄旅襯岳土亦烟墟一世惟漂
泊平生可歎歎高名天所靳此理復何如

懷故友楊方叔

游戲人間世清虛物外緣皇家雖結網空谷竟遺賢無
恨堪懸劍傷心有斷絃今年湯餅約為爾一凄然

漁舍新成

旋規漁舍傍溪山山轉溪迴翠竹間間看羽觴行詰曲
戲拈竿綫弄潺湲浮家不入分風浦歸棹休尋落照灣
謾說五湖烟浪好幾人險處得心閒

山中

籬畔黃花翠竹雨後青山白雲此是山中活計莫教俗
士知聞

秋來喜雨

西風吹雨洗林廬夜深涼氣生庭除呼童為我掃蘆簾

便欲拂拭紅氍毹冠巾三肅傅頭顱締綌輕利體不濡
似覺禮法由吾徒寢甘食美增腹腴牀頭有酒不用沽
更煩黃菊催紅萸一秋辦取三百壺二三佳友不可無

寄汪尚書

五十年間歎濶疎相忘兩地復江湖書來筆底驚強健
詩去吟邊想步趨好對青山看歌舞莫嫌紅粉笑髭鬚
鳳毛已有哦松韻尚記金華舊範模

和

汪大猷

投分雖深迹却踈君居東婺我西湖兒曹方喜承毛檄
父執應容效鯉趨慨念舊游多宿草

舊同官六十餘人
今唯大猷獨在

僅餘二老見霜鬚詩來喚起相思夢又向梅山得楷模

甲辰歲以詩一編進孝宗聖語且許其清新驟

蒙擢用暇日感孟襄陽事聊賦數語

襄陽孟浩然牀下謁至尊一語不合意放還歸里門我
詩雖不工騎馬入帝闕飽暖自茲始永懷明主恩

劉公達覓酒

作詩覓酒真豪士況是今年富酒材豈有豪詩不豪酒
請君須飲及時盃

初夏

松花金粉落荷葉翠鈿浮啼鵲千山暮一年春事休

喜仲春有閏

仲春閏月天氣佳天豈有意遲羣葩天公正為老人設
剩添一月延韶華今春計日百二十不比嚴霜烈日空
增加良辰好景不易得此日詎可容易過漢家天子賜

甲子所見殆可兒童誇直須爛醉荅造物秉燭列炬驚
林鷄

王思叔惠巨竹一竿

清晨剪送碧琅玕想見軒牕六月寒便欲持將釣東海
未知何處可投竿

齒脫

髮白壯志凋齒豁生意少寒暑幾八旬咀嚙歲月久請
君視追蠡血氣豈長好吾祖仕進初兩齒僅能有此翁

不即人乃為人所取退之太崛強方誇膾鯨手畢竟將
何如人生不堪老

雪後雙溪城外

雪消間出郭騎馬踏山橋池響冰澌落泥融鴈齒消

詠間

一年間有十年功十歲如將百歲同此去得閒猶未已
向前日月盡壺中

病後負暄

陽和被四體覺我病骨輕血氣相貫輸浩浩梨棗生以
我身中離交會丙與丁陰盡命自長何必求丹經

水仙

六出玉槃金屈卮青瑤叢裏出花枝清香自信高羣品
故與江梅相並時

移瑞香

少年無酒荅羣葩投老逢春鬢已華今日對花無意思
花應憐我我憐花

飲酒

平生嗜酒不耽酒不愛深斟愛淺斟
嵇阮詎能知此味
可憐一世只醺沈

偶成

膩白天紅漸滿枝
倡條冶葉競紛披
化工只解呈新巧
惱殺衰翁都不知

澗上

晴蜻舞幽澗
水鵲立枯槎
予亦坐烟壑
有生俱有涯

春晚戲題

歲月飛騰不可回
紅顏去盡老相催
自憐皺面無光彩
賴得春風為熨開

尋春

選勝尋春莫預期
風和日暖即佳時
行庖草草何妨事
明日陰晴特未知

庚申春再得奉祠

香火緣深宦意灰
十年蕭散卧蒿萊
龐公從此不入市

只與漁樵相往來

老衰畏寒晨起婢輩熾炭紅焰滿室身心俱泰
喜而有賦

嚴晨一爐火愛重如兼金既已暖我軀且復豫我心因
思孟東野曲身長苦吟何如貴公子得意椒房深

香菌出括蒼山谷中其味香滑絕妙昔嘗欲獻
之壽康終不敢也

薰蒸應地德香滑異園蔬天花非爾倫金芝恐其餘雅

宜齋庖薦不受羊羹汚將欲獻天子誰為達區區

夜飲

風高霜挾月酒暖夜生春一曲清歌罷華胥有醉人

幽事

幽事春來早晨興即啟閣掃梁延燕子挿援護龍孫數
日招賓友先期辦酒尊淋漓衣袖濕不管漬春痕

諸葛孔明

臨發漢中時精誠見表辭此心誰盡了死後有天知

二月有霜海棠頗瘁

青春淑景忽飛霜餘烈猶能到海棠
中山靖王孺子妾
尚書門下主謳娘

初夏

催成新夏荷浮翠送盡餘春柳褪綿
正是清和好時節
嫩柯嬌葉媚晴天

王忠叔惠象牙筍

魚煮船頭筍煮園一時風味最甘鮮
君家象齒先春發

為我携鉏斲翠烟

晚春

品物趨時憫寂寥
靜觀玄化自超遙
鸚因求友偏饒舌
柳為含綿嬾折腰

適齋先生續樂天達哉行因繼其後詩雖不工
聊抒鄙意而已

樂天吾所敬掛冠方一年家事能幾何處置有後先始賣
南坊園次賣東郭田末乃貨其廬緡錢可三千不為子孫

計冀可了目前嗚呼古之人未易相比肩顏子附郭外
不聞鬻其肝淵明松菊逕仲蔚蓬萊間闕一尚不可而況
盡棄捐先生果何心達者未必然適齋賢主人歸卧甬水
邊家中無留買饑食困即眠不可學其可已省區中緣
嗟哉我何人愛慕此二賢素貧乏常產晚有屋數椽
聖君不忍棄未許車高懸月散官中粟不蓄俸餘錢性
復喜賓客日日羅槃筵萬事不掛眼尚為詩所纏山上
列花木山下疏清泉終日自逍遙濠上樂亦全起予者

誰歟三誦達哉篇

雲岑

雲岑抱秋陰
水木起夜色
原野漸蕭條
田禾捲阡陌

閒吟

天公靳惜是虛名
恠我吟詩筆不停
莫把文章覩天巧
只將渾沌養餘齡

偶賦

不織不耕日無憂
無惱身曠哉天地
德養此最閒人

野坐

野坐花飛片溪行水漲痕山中間日月世上別乾坤

不貪

人間五福少世事罕兼全將此不貪寶延予有限年

偶至郡城

老矣息奔走胡為此登途行李雖草草客懷亦舒舒傾
我壺中釀閱我袖間書在家故云好愛此暫時娛

無客

無客意不佳獨飲有何好雖非甕下豪亦匪澤中搞百年會有極正要舒懷抱不賦獨酌謠相期醉鄉老

冬夜不寐

宵柝迢迢警睡魔靜思世分老林坡忍胞只有嵇康嬾扣角曾無甯戚歌不起妄心思世事只將閒意養天和時人休說長生術學著長生事轉多

因赴郡會入城

十年林下自由身已放嚴光作外臣終日奔馳非我意

有時嚄囁失天真，龐公不合來城府。
梅福如何走市塵，策蹇明朝且歸去。
故山猿鶴自相親。

賀王季發提舉掛冠

明主尚書識履聲，君持閤節復儀形。
八年可仕不謀祿，七秩及時斯引經。
肯把清名誇薄俗，只將厚德養脩齡。
新詩祖送三千首，疏傅當時得寧馨。

次洪監簿惠詩韻五首

相逢可恨十年遲，鍼芥相投更不疑。
從此詩筒數來往，

不須千里寄相思


新詩三復用功深始信今人有古心
關葉儼花兒輩事
唱高廟瑟有遺音

自古詩人失意多偶然歲晚惻蹉跎
如今世味都如蠟
水際林間自日哦

三洪文字照乾坤小謝風流筆力存
悟解向人難舉似
見花微笑自忘言

莫嗟官路昧通津舉世滔滔豈識真
早晚青雲如直上

正須文字為藩身



梅山續藻卷九

欽定四庫全書

集部

梅山續藁卷

十至
十二

詳校官庶吉士臣翁樹培

主事臣呂雲棟覆勘

總校官進士臣繆琪

校對官中書臣朱圻

謄錄監生臣伍士鵬

欽定四庫全書

梅山續藁卷十

宋 姜特立 撰

幽事

日日營幽事時時有好懷
雨園殘竹粉風砌落松釵
伴蜨行花逕聽蛙傍水涯
窮通了無謂不必更安排

觀插秧

插秧如插針瑣細亦良苦
分徒一夫積終畝衆力舉
曾不旬日間綠遍天涯土
周家重開國幸勿輕農圃

悼亡

平生起居處杳杳復冥冥人遠迹亦沈邈焉居者情以
此觀世間無物可留意有如空中雲東西適相值雲收
天宇開虛空了無事

晨起信筆

姜子胸中有至樂青山白雲也不惡不求作佛不求仙
却笑時人用心錯樂天兜率墮渺茫徐福神山更遼邈
丈夫天地要同流俯仰隨化吾何求太虛為體隘九州

不須更述逍遙遊

子陵瀨

不為故人出出則將如何交道古難終豈唯畏虞羅蕭
何豐沛舊未免投金科先生誠高哉無媿紫芝歌

雅志小飲適寬仲送相州法醞并竹萌同至

相州畫錦堂厨醞衛國淇川岸竹萌二物煩君走分餉
時哉秉興倒瑤觥

晚晴

草木肥梅雨江山快晚晴芳塘荷芰發香泛葛衣輕

齒將脫齟齬抵牾時或隱痛戲成

搖齒不可仗反側如小人王陵雖少慙信越終難馴魯衛固小弱秦晉依強鄰更託輔車勢庶以活吾身

讀范文正公上執政書靖康之禍正以人不知

兵

經籍盡焚秦室亂孫吳有禁本朝危聖賢文字初何罪羣小盈庭事可悲

白髭

檢校精神日向衰
義和促轡過如飛
白髭可是長無賴
換我紅顏不放歸

贈湯仲輝郊居

木橋橫野水竹逕
踏晴沙桑苧交陰處
中藏隱士家

東坡除夜三十九
遂引樂天行年三十九
歲暮日斜時之句
賦詩余亦於生朝有感

昔人三十九已歎日斜時
吾今七十六屈指一倍之豈

唯桑榆晚正自入崦嵫灰中炭暗盡豈不心自知且飲
生朝酒更賦梅山詩

野步

倚杖立江干丹楓疊嶂寒何人三昧手畫我看秋山

動植

動植湊東風天機各自濃花粘蜂股重絮戀柳腰慵

雪晴

六出弄陰機新晴閃夕暉餘寒隨鴈去殘雪帶春歸

葉叔佐妻輓詩

元是毗耶女來嬪居士家一門函佛界三子摘天葩積
累千金富追迎百兩車合書賢婦傳遺像儼笄珈

間興

天氣正清和人情物意嘉綠樹蔭屋角微風起簷牙挾
書仲舒園種菊淵明家逍遙無一事遠志凌青霞

再贈湯仲輝

肥遯元無悶躬耕亦自娛曲肱安陋巷愛爾亦顏徒

詠蠶

儼儼屢神化宛宛始成室生從五泰初事至三起畢利物先遭烹謀身自無術衣被遍四方丘山計端疋豈知驕奢主結綺縱游逸剪綵滿園林光輝豔風日理宜得敗亡此道天所疾禮經重親蠶一縷知自出大禹惡衣服仁儉由聖質我本生田家蠶織嘗究悉初不恥緼袍一煖志願訖

葺圃

種樹書頻讀齊民術屢窺曾求竹醉日更問柳眠時盧
橘初非橘蒲葵不是葵因而辨名物甘作老樊遲

韓子師朝路為小人無禮去國再來婺女

推敲乍可恕詩客攘臂豈容遭怒塘三尺何時尸鼠輩
九霄一日失鵷行君王擬聽尚書履使者行催相國裝
共喜日邊歸去近雙溪椎鼓下舟航

庭下棠陰七換秋去思遺愛滿東州當年父老留大尹
今日兒童迎細侯久別雙溪勞夢想重來八詠識風流

故人再此相逢地曉出衡門失舊愁

翫月

天風忽披拂覺我襟袂清雲片玉鱗薄月華金暈生曾
於滄海看浩蕩此時情髣髴見三山洶湧波浪驚

晨起

東旭曉曛曛照我墻角紅衰意忽開豁衰顏亦丰茸便
欲理晨策去遶菊花叢惜無會心友一尊清興同

古意

共綰同心結那知有別離對人爭忍說不敢畫蛾眉

霜後菊

嫩黃釀白媚秋暉正坐清霜一夜飛似怯曉來天氣冷
一時都換紫羅衣

送邦佐弟歸鄉

昔時俱是一兒童今日相看兩禿翁舊約對牀心自喜
新詩入夢句仍工吾衰已覺身如幻汝老猶疑氣吐虹
南北相望才數舍何時更卜一尊同

子陵

足加帝腹狂奴態自是君王禮數寬四海但知天子貴
先生只作故人看

喜雪

陰宰弄精神空中舞玉塵入簷燈影亂折竹曉聲頻照
幌光侵曙欺梅氣壓春老夫貪快賞呵凍拂烏巾

柳

長條攀折歎離披底事人間管別離何似龍津通御氣

建章宮裏鬪腰支

懷方叔

憶昔尊前共賦詩
如今仙去見無期
吟魂想只空山裏
嘲弄風光人不知

有感

滴水添壺箭跳丸
疊嶂崦嵫只誇顏
似玉不覺鬢成絲

初夏

時節催農圃園林
花事空柳蒼無故態
苗長有新功

因觀贊皇平泉草木記有感

平泉草木頻移主西雒園池幾換人
但把風花觀世界莫將金石認吾身

悼邦節弟

皇考憐同出青山憶並廬前春曾訪我
無月不來書易感中年後難忘少長初
倏然成夢幻歲晚重欷歔

張致政輓章

上壽身仍健榮封歲屢終無因拜龐德空
幸識王戎舍

玉亡遺恨懸車近古風
燎黃應不遠光寵賁幽宮

次韻黃司理

龍墀射策筆如神
馬首哦詩句益新
忽捧名篇端有意
欲求強對恐無人
浸淫漢魏知追古
摸索曹劉已識真
荀氏八龍誰最著
慈明頭角在雲津

悼何求卿內子王氏川人王丞相夫人母之姪
姪

名父飛鳬席慶長
良人傅粉舊傳芳
籃輿曾帶陽臺雨

花院俄沉婺宿光
表表門眉看列倩
詵詵蘭玉有諸郎
不唯綵誥生前寵
更有豐碑自玉堂

漁舍感秋

小築瞰清流
人間境更幽
蒹葭寒帶水
蟋蟀靜吟秋

繭菴回

歸路俯清川
呼奴自刺船
戲魚翻晚照
宿鳥入寒煙

暑退秋夜賞月

冠巾暑退纔如律
詩酒交情不作踈
今夕孤光清到骨

鏤冰裁玉滿林廬

拒霜

楚天寂歷暮雲平何處江村落鴈聲正是西風掃黃葉
不知春色在朱榮

罷劉巖酒庫

世事升沈倅蝶化吾生來往更蠅營歸心有愧陶元亮
家事當如尚子平豈是木雞猶有變故令漚鳥尚相驚
老夫本自無城府抱甕何妨過此生

閩中得家書

家書隔歲至生死半一新新故無已時悲喜俱傷神人
生茲世間誰是出世者有如獨繭蠶終日自纏裹迢迢
碧海路青鳥長來去安得挾雙成吹笙入煙霧

海上獲捷禱於廟神王公方交鬪間賊桅忽倒
赴水死者大半後請于朝賜額靈惠

直駕樓船擣賊桅金槃一擲萬人開何當為奏褒封典
醜酒刲羊亦快哉

出閩中四首

山行十日到吾家
臘盡歸人惜歲華
斗酒隻雞誰勞我
更須踏雪看梅花

千里携家一秃翁
一尊倒盡百愁空
野梅可是工迎客
排日開花到浙中

飄蓬不歸根而我
還故里有食即可安
何必土風美豈
非俗緣故墮此膠漆
底艱關一月程
況復携老稚囊空
畏途遠蓐食常夜起
人生貴適意奔走殊
未已俟有三

逕資吾生恐無幾

晚出仙霞嶺平原豁故關石窮千里逕雲失萬重山漸
喜鄉音似遙知兒輩歡不緣懷里社倦翼未須還

梅山續藁卷十

欽定四庫全書

梅山續藁卷十一

宋 姜特立 撰

湖光為劉慶遠作也

湖水浸坤軸湖光混太清風來縠紋起夜靜鏡奩平初
訝琉璃軟還疑組練橫微茫連澤國瀲灩蹙寒汀破碎
翻千月泓澄印萬星雨來添點綴日射鬪晶熒橋影虹
垂澗杉陰幕覆亭魚跳金薦玉山臥半沈青小泛依吳
榜長謠任楚萍擠排李白醉勾引屈原醒暇日宜呼客

平時好濯纓吟哦萬景集未足稱詩情

編猥作

老來事業無多子收拾新詩又滿編金玉那能潤身後
等閒猶作百年傳

秋園

商氣入山園園花取次妍蓼叢迎露重菊本望秋圓

再悼邦節弟

滿腹書何用謀身事竟非中堂親尚在私室子疇依人

去驚溫沒秋來愁鴈飛
它時風雨夕相憶淚霑衣

月下

晚來暑退坐前墀
嫋嫋南薰動翠微
便欲乘風遊汗漫
白雲頂上翫清輝

送謝叔光

青陽迫殘臘寒色滿江干
我有採薪疾君方行路難
來無十日款去作一程寬
翌晚解鞍罷親庭足笑歡

歸括蒼和楊嗣之吏部煙雨樓韻四首

誰發天慳得勝遊佳名收拾更無留鄭虔祁岳今誰是
為掃陰沈萬壑秋

幾重綠樹暗羅紈多少空濛遠近山物色聯翩吟不斷
使君佳句玉連環

絕唱從前恨未多騷人墨客浪經過直須吏部楊夫子
始奈樓中煙雨何

宴坐簾旌捲翠微朝昏萬變發新姿錦囊莫怕嵐霏濕
帶取風光入鳳池

嗽筍

自從孤竹夷齊死清節何人萃一門惟有此君無俗韻
至今風味屬諸孫

赴飲席家人供新衣

勸我著新衣深辭老不宜如今百事懶不比舞雩時

柳

森森萬木勢崢嶸千尺孤標更上征惟有柳絲低拂路
腰支憔悴為多情

曩備員官屬令旨畫策覓詩字以金書

時頒便面覓新詩巧畫花枝作好題多謝東皇不嫌棄
親將仙手寫金泥

林欽之主簿輓章

敬讀銘鐫語遙知磊落胃義襟如郭震豪氣似元龍萬
里推車軸三春折澗松天雖不可問餘慶後人鍾

寄韓判院南澗常伯之子

每思南澗一淒然不見風騷二十年子厚猶能記先友

審言且喜有家傳
蜩螗聲亂無遺響
山水人亡有絕絃
海內可能無法眼
直須叅取祖師禪

庚申度夏自適

透脫逍遙外
遠離煩惱濁
中夜夜滿懷明月
時時入夢清風

戲題

樂天妙語過雞林
平處猶為治世音
豁達如今唯李老
不妨風月自閒吟

慶歷中京師有民自號豁達李老好吟詩詞多鄙俚一時貴人戲語多及

之

閨怨

別恨迢迢千里餘
天涯何處覓音書
花間羞見雙雙蝶
水上愁尋六六魚

暑退喜秋

頽齡厭濁暑瘦骨便清秋
尊收方回鑣灝氣橫九州
老鶴生精神孤松鬱颼颼
如飲寒露漿貯以青瑤甌
既蠲膏肓疾復洗熱惱
憂斟酌楚人賦併作商聲謳

暑退

歸臥林間十二春心安日日是良辰家居佛界清涼國
人住仙宮自在身無事入山尋阮客有時擊壤助堯民
雖無高行追先隱畢竟田園樂亦真

歌豐年

稔歲非常歲時時霧雨并陂塘留夜月澗谷瀉秋聲臥
袂驚宵冷披紗怯曉清水泉俱自足阡陌更無爭荷鍾
疏餘浸腰鎌候小晴秫材寒眼富酒興老涎生便覺糟

床注還欣庾粟盈
新君鍾瑞慶舊俗
迺昇平賽社雞豚
具迎神笳鼓鳴支
離徒受粟一飽愧
斯氓

人送巖桂二首

七月濁暑氣氤氲
天香忽墮明月輪
一枝先入西風手
洗我三伏甯中塵

香馥清晨可療饑
飽人勝食齋房芝
便好架巢枝上宿
不愁無酒只愁詩

漁舍

漁舍時時須一到水光山色淨相親
玉肌花貌不須替自有陽臺行雨人

詠菊

菊稟金天精勁氣凌風霜水流山下潭
飲者壽命長泛我盃中物染我詩句香
所以陶徵君愛之不忍忘

秋來得雨

夜來一番雨青我一席蔬洗甌炊香秔
何必食有魚便可釀新秫唧唧鳴齋厨
且以樂殘年此外不願餘

憶仲子

吟哦五字有規模妙處時時亦起予送老百年將付汝
豈知顏路請吾車

報國如乖願歸耕寧買田此歐陽公酬杜正獻
告老後詩也前輩名公亦有買田詩句蓋寓歸
耕意爾豈真若今士夫為多田翁耶

出仕雖無補歸耕寧買田聊將報明主庶不愧前賢

哭仲子

一日死生隔平生父子休暮齡逢逆境老淚濕清秋浪
急珠沉海天昏壑失舟煙霄落鵬鶚天殿喪驂騑萬里
車軸折百年江漢流吾生今已矣世事付悠悠

邸報京丞相薨背

丞相今朝薨相位衣冠贈典一番新作場好夢歸鄉去
仰羨無非夢裏人

暇日歎日月之逾邁念吾生之幾何感而成章
密移不自覺猛省却堪驚紅顏去不返白髮來無情却

秦氣何用袒漢力莫爭求勝竟無術陶然任此生

致政張教授晚而買妾有女戲贈

隱君無婦幾經時暮景鰥居却未宜且喜中郎新有女
豈容白傅老無兒閨中不著玉川婢天下應傳京兆眉
無計去陪湯餅客花卿有子待歌詩

賞海棠

海棠初破萼紅豔欲無春小插依霜鬢花應怨老人

諭亡子

死固汝可憐生亦我所愛生死兩相繆吾將解其會

余有仲子之戚九日親故携酒訪我於梅山之
上因詠昔人詩人情皆向菊天意欲摧蘭之句
不覺淒然有感遂易一字足成篇

九日上梅山愁心卒未安人情皆向菊天意獨摧蘭管
女不及嫁萊衣空自寒牛山多感慨把酒淚闌干

野意

謝安高卧向東山白傳分司雒水灣賓朋歌舞歡娛處

金剛經
卷十一
只在山光水色間

陳右司輓詩

麟經絕學冠名儒科甲巍峩壓雋途兩作星郎歸省戶
五持玉節佩州符義倉睦族前賢少猶子推恩舉世無
忝竊親鄰違一奠不堪老涕落寒鬚

書壽穴中石壽星背四言

彼石何人云是壽者作鎮斯宮孰分真假以幻對幻有
同兒嬉他日啓扃問爾是誰

老饒

八十血氣衰交累身口故喜讀奉親書竊誦老饕賦烹
飪付家人甘旨輒復具爛軟既適宜調芼亦合度兒女
各貢勤栢羹走童孺鄰里重交情時時分果茹興來一
舉觴直到醉鄉路此樂異百年此腹恐相負

晚起喜晴

老翁喜晴色屋角候晨曦圓影纔明隙方暉已鑒帷呼
童聊擁褐得火即舒眉盥櫛渾無事看山就小詩

感物

今年葉底已藏花
來歲還抽後歲芽
代謝乘除無了日
須將定力看浮華

甲辰歲進詩一編
孝宗許其清新翌旦宣諭宰
執召試再賦一首

午漏奏新詩
昕朝召節飛
若非梁武帝
誰識謝玄暉

菴菜

梅山菴菜勝羹藜
恠見賓筵玉筍齊
大似雪堂真一酒

絕勝金谷韭萍齋

以菴菜喻酒此東坡荔子比江瑤也

憂患中作

吉凶既同域憂喜亦同途萬緣互起滅誰能久歡娛
娛既不久悲恨常與俱唯有嵇阮輩乃能脫囚拘一醉
了生死豈復念區區小兒玩造物造物亦戲渠舉世憂
其憂放浪樂有餘

虞察院生日

新開絃管召天和喜氣悠揚際海涯向曉金蕉稱壽處

歡聲更滿使君家

二

自輟清班素望崇凜然爭仰栢臺風大姦鉅猾宜深屏
且避當年御史驄

三

向來施設躅蒼川荒政方勞問計然今日雄藩得長袖
請君著眼看回旋

四

雨暘時若賴君侯萬室歡呼慶有秋不論高原并下隰
民間稼黍一時收

五

今年旱火欲燒空盡是忱誠默禱功尊酒豚蹄亦何用
使君心自與天通

六

使君決遣烈秋霜不許烏衣立坐傍一吏持毫供點染
向來鴈鷺不成行

七

鉏耒除荒政若神俗安民靖絕紛紜清宵不見犬吠盜
綠野更無羊敗羣

八

下車好語敬書紳誠意區區只為民今歲年豐米狼戾
更須通變惠斯人

九

天詔飛傳速置郵雙溪門外促行舟橙黃橘綠風光好

併看西湖十里秋

十

文章近古追前輩政事方今絕後塵聊佩左符猶未稱
好歸黃閣試經綸

梅山續藁卷十一

欽定四庫全書

梅山續藁卷十二

宋 姜特立 撰

傷老

老翁足力弱踉蹌如小兒須杖乃能行動步憂歎危髮
禿生細毛正似出胎時忽復長兒齒輔車兩相依還童
既無術衰謝乃其宜載念天地間八十者幾希如我真
幸民何必暗傷悲且飲北海酒自吟東老詩

喜敗篋中得舊詩

十首詩篇久棄遺偶翻故篋有光輝恰如建鼓求亡子
一日門前忽自歸

風色

風色作吳霜山中草木黃冷烟籠碧瓦露葉徧寒塘

對花戲作

八十衰翁歲月高可憐老氣尚猶豪春來縱被花相惱

半是無心半搭猿

出小說

追感三朝遭遇今如一夢

本是蓬萊姿偶作帝王客日日上金門時時分玉食自
忘身世賤不覺仙凡隔幾多賢達人饑寒臥空澤

余垂老於居之西偏營小堂面對南山一峯卓
然榜曰如山蓋取詩人意也

一峯高插丙丁間南極星光伴我間不向仙君乞如願
只從造物覓如山

菰苴初冬稍茂喜而有作

紫莖生春萸助我作湯餅黃菰養土膏冰壺添雋永凡

物貴適口何必須九鼎况我藜藿腸萬錢慚食頃

再賦如山

小堂草草屋三間暇日徜徉養壽間揭榜如山還自笑
何人不老似青山

肉饌菜蔬

饌字從俗

玉食舊游寧作我藜羹故態未忘吾爛熳菜蔬甜如蜜
細點豬臠滑似酥

又賦如山

如山堂上好登臨
羅列堂前紫翠岑
萬古烟霞供坐嘯
四時風月伴閒吟
海鷗心性滄洲遠
野鹿精神草樹深
却笑井蛙并轍鮒
只知缺甃與蹄涔

懷古

古來一代文章事
自有風騷翰墨臣
今日蘇門四君子
異時鄴下七詩人

月

萬古長空月虧盈
不計年魄生蟾共
沒光滿蛤同圓

春物

一春天富貴萬象物光華遙想西湖上風流賣酒家

和王粹中

非農非吏本同塵
曾次何時不是春
戶外松筠隨意好
山中風景逐時新
擇鄉幸喜仁為里
省已深慚德有鄰
事契姻聯非一日
嚮來俱是異邦人

長至後

遲遲晝景轉庭除
似覺今朝化日舒
印篆旋添香畧刻

繡牀暗積線工夫

劉益之判院輓章

傾蓋如今五十春中間還得綴華姻
單于萬里同哀使馬援一鄉稱善人
告老已能官及子頒恩更喜爵榮親
佳城一閉成千古無復傳觴酒入唇

潘夫人輓章

登堂曾拜太夫人秀偉端方迥不羣
為子求官因白屋有孫擢第自青雲
身兼富壽人應少眼見曾玄世罕聞

已被榮封猶未已更看褒贈貴新墳

拾遺詩

過行在宿簷塘

三十年間倦路岐今朝猶自羨輕肥
敝輿衝雨方行役朴論干時未息機
日暮腸枵聊命酒夜寒衾薄旋牽衣
一屨三徑何時遂且待相如驕馬歸

遇雪

艱難要經歷勿為居所移方茲冒雪行
有愧在家時杯

酒全無力春寒易著肌誰能念此老團坐有癡兒

留題雪峯

雪峯未到意先猜只恐冰崖凍不開多謝天公憐倦客
故將暖律入疎梅龍湫慘淡驚神物象緯崢嶸逼斗魁
顧我區區亦何者扶藤能為此山來

代陳公實上通守王剛父四首

我識通川守人才世所稀金陵傳正印葉縣悟圓機國
論曾三接邊城且一麾從今雌甲子洗眼看雄飛

成解淮山月波平瀚海秋主憂銷北顧賓宴接南樓自
愧成村叟無因接勝流鈴齋聽客鴈應念稻梁謀

淮上津程遠山陰信息稀有塵生曉甌無帛剪寒機稚
子莫垂泣故人今把麾歲闌歸意速目斷鴈南飛

沈甲通盟後同庚緩帶秋邊聲寒臥鼓海色靜明樓冉
冉歲云莫栖栖詩者流不才同社櫟一飽愧身謀

和雪詩

恠見司寒著意濃巧裁六出羨天工烏翻樹拂梨花月

鷺起沙平玉篆風勢合深連雲渚北光寒淡抹粉牆東
梁園賦就驚先手末至相如敢擅雄

通守田太尉生辰二首

犀庭淵角凜英姿褒鄂凌烟想畫時建武堂深閒緩帶
籌邊樓迥靜哦詩曾乘神驥叅天仗還挿宮花賜寶卮
今日北門方借重九重久已結深知

吳頭楚尾幾名邦公以循良達舜廊未把勲庸齊寇鄩
直將教化繼龔黃蠹蠲前政人云樂最上諸司議曰臧

只恐周廬賴彈壓芝泥趣召覲清光

昭君

漢宮胡地真天壤一別長門隔塞雲
莫謂琵琶慰行役
琴心不比卓文君

賦孫宰知魚亭

萬物各有適所樂乃其天達人默識之此意妙難傳賢
哉漆園吏知魚豈其然客問子非魚烏知魚樂全答云
我所知之濠梁間問者固已遠答者不亦難要知知

魚樂當作夢蝶觀周與蝶非兩魚我寧相懸海門孫夫子讀書必鉤玄結茅製小亭下瞰碧玉灣因魚揭佳名理蹟非言詮夫子固知魚魚亦知君賢我欲從之游褰裳濯清泉魚乎可勿猜久矣忘機緣

江口阻風寄琅山袁老

人間有淨境咫尺不易通今朝解塵縛始到天人宮疊嶂擁崔嵬夏木鬱青葱白鳥巢半山掩映畫圖中高低闢窓牖綠陰翳芳叢境寂意自佳坐久心彌空更茲主

人賢晤語禪味融歸途若有得便欲超樊籠奈此塵緣
深蹤跡如驚鴻驅車出蘭若俯首坐踈蓬連日滯江干
風雨渺冥濛緬懷支道林此會何時逢

贈孫宰雪中招飲

令尹宣和氣冰花兩度開德星方此聚瑞應瞥然來玉
篆縈紅炬天酥落酒杯相持索新句慙愧謫仙才

施元用醉謁邑大夫胡公公賢者也不以為浼
己翌旦袖刺見之元用以喜雨十詩為謝仙尉

孫公贈詩白甕邊不識畢吏部筆下方知李翰林釋其嫌一時和者相繼其族兄德茂復有詩箴之元用遂銳然止酒事有曲折情存彼此然百里不失為通德茂合於義元用勇於決皆是也括蒼姜子為長篇以合之簡元用兼呈諸公庶幾期於大同泯然無迹矣

肩吾有雲孫磊砢東州瑞一誦能萬言落筆忽千字才拙獨繭緒態湧春雲思喜慕高陽徒時追習池醉笑被

儻因拘跌宕每自肆心知令尹賢詭迹姑爾試誰知趙
蘭卿復袖襦衡刺非意忽相得直到古人地施君激深
知十詩手自贄梅仙亦奇才睨此一時事新篇發佳話
冰釋兩公意賡載皆文豪璀璨明璣墜西鄰有伯氏規
切豈亡謂甘言古所戒矯枉未傷義昔人有火攻達士
胡足累施君真勇者念酒寧我崇指天誓止飲忽改開
羣視邴原恐廢業陶侃憂親志獨醒向清湘自責當先
隧古來有若人於我適相類勿學劉伯倫詛婦儕兒戲

勿學陶元亮止酒詩非志自此真止矣惟當醉經筵酒
然啜醇醪抖擻糟粕棄沉酣日滋久富貴可立致視彼
九醞功未足易所嗜持將沃宸聰澄醞有遺味異時理
扁舟却載鴟夷器

為通州守賦綠漪亭二首

亭占佳名淮海東六丁擁上水仙宮簷牙簾額烟霏裏
人語歌聲荷氣中酒醺吸殘千斛月釣竿擲下一絲風
使君清德真如水潭影人心盡日空

景物天開四面寬如披百幅畫圖看有時鷗鷺下蒼靄
無數菰蒲生碧瀾獨立晚涼秋思動醉呼小艇水雲寒
他年虎節重來訪唯有恩波不解乾

題琅山大江

初出岷峨一線微波濤到此浩無涯坤隅橫貫五千里
天塹雄當百萬師虎戰龍爭猶可記鷗閒鷺靜幾曾知
莫言天意限南北正是中興混一時

明月歌

月在天兮何高我居世兮何卑高卑相去幾萬里年年
夜夜長相隨明月入我懷我攬明月輝妙明中間含萬
象此時此境誰能知

閒退自適

老退保餘生不愧身與口大似劉真長東山亦何有

對酒

老態日日增歡意時時改唯有對壺觴依然此心在

春事

春事動勾芒閒行嗅嫩芳人無前日興花有舊時香

寄虞大卿四首

韋郎昔日在蘇州唯許丘丹共唱酬今日故人天上去
誰將好句慰清愁

彩鳳鏘鳴瑞上都秋蛩春蚓謾吟哦寄言郊島休聯句
且聽臯夔賡帝歌

聞道新詩日漸多珍藏未放落江湖拋輒此語真相戲
和璧如何肯抵烏

昔年寓郡獲親依
句妙時時得解頤
每過雙溪溪上路
邦人猶誦使君詩

春到

春到天寒花未芳
老人寸寸惜流光
攀條先試東風手
蜂蝶如知合斷腸


寄題須記亭

橙橘年年熟青黃
滿故枝坡仙自有見
妙語寄新詩好
處須令記欲記難
為辭公意非我意
我樂公不知體會

在何所請觀濠上時

梅山

欲識梅山境回環列萬峯朱門依綠水粉堵出青松



梅山續藁卷十二